

## CI TUORNI

'U tieni â menti  
se, ô passatu, ri nnicu  
à 'ntìsu, nê ciusi,  
muligni e cianciani  
sunari,  
e ri notti,  
cô lamientu rô vientu,  
'i cani abbaiari,  
o 'a matina prestu ca agghiorna,  
'u jàddu à 'ntìsu cantari.

'U tieni â menti  
e 'u sarbi nô cori,  
e 'n juòrnu, crisciennu,  
cci pienzi e cci tuorni.  
Prima o dduòppu cci torni  
armenu 'na vòta nâ vita  
a pustijàri  
nâ vanèdda  
l'aria ca tira  
e a taliari,  
nâ sira,  
rô 'ccàgghiu,  
'u purticatu ri fierru,  
ca rapi nô bbàgghiu  
e sèntiri  
'u ciarmulù 'ncuzzatu  
râ catina  
ca scurri  
nô catinazzu arrugghiàtu.

Ma se 'ntra ê filazza,  
ora,  
'n'ucciàta cci 'nfili  
t'adduni ca 'i rintra,  
a sti tempa,  
nun c'è nuddu,  
nun c'è nenti  
ri chiddu ca tieni nâ menti,  
e 'i muligni e 'i cianciani  
a 'n cavigghiùni  
su' appisi nâ gnùni  
e sulu 'u vientu  
r'ogni tantu  
'u lamientu cci scippa  
anticu ca veni.

Eppuru, strata faciennu,  
ddà via ,  
ccô vientu ca frisca,  
se senti luntana  
'na 'mmòta 'i campana,  
ancora ci pienzi,  
e t'agghìri,  
e armenu 'na vòta  
'u pinzieri  
nô cursu â jurnata,  
ti torna 'narrìeri,  
pi virri, 'n sia mai,  
se 'u 'nnumani ca agghiòrna  
arritorna  
e s'agghira pp'aièri.